

Headline	Sesuaikan diri dengan kesan cuaca panas		
MediaTitle	Kosmo		
Date	02 May 2016	Language	Malay
Circulation	197,202	Readership	875,000
Section	Negara	Page No	11
ArticleSize	363 cm <sup>2</sup>	Journalist	Bersama .
PR Value	RM 28,260		



# Sesuaikan diri dengan kesan cuaca panas



**B**EBERAPA hari lalu, heboh di laman media sosial terutama Facebook apabila para pengguna mula memuat naik bil elektrik yang boleh disimpulkan lebih tinggi daripada biasa. Bukan sekali ganda, malah ada yang dua tiga kali ganda luar biasanya. Tidak terkecuali penulis sendiri mengalami situasi yang sama. Penulis juga menerima kadar bil yang lebih tinggi daripada kebiasaan.

Pembacaan di Facebook Tenaga Nasional Berhad (TNB) Careline juga mendapati, ratusan pengguna laman sosial itu turut meluahkan rasa tidak puas hati berhubung isu tersebut. Rata-rata mengeluh apabila mendakwa, kenaikan mendadak itu dirasai sejak Januari lalu.

Salah satu contohnya ialah komen pemilik akaun Ahmad Nisfu. Menurutnya, bil elektrik di rumahnya meningkat tiga kali ganda apabila kebiasaannya mencatatkan hanya RM40 tetapi melambung menjadi RM120 baru-baru ini.

"Kepada yang tidak terjejas itu bersyukurlah, kami bukannya tak nak bayar, tapi kenaikan di luar jangkaan. Rumah saya tidak ada 'aircond' (pendingin hawa), biasa bulan-bulan *maintain* (kekal) RM40 tetapi kali ini melambung sampai RM120," katanya.

Susulan aduan dan komen yang bertali arus, pihak TNB Careline dalam Facebooknya turut memuat naik satu kenyataan akhbar berhubung isu bil itu.

Menurut TNB, pada kebiasaannya cuaca panas terik dan kering mempengaruhi tabiat penggunaan

peralatan elektrik khususnya alat pendingin hawa yang secara relatifnya menggunakan lebih banyak elektrik.

Berdasarkan pemerhatian, rata-rata pakar mengaitkan kenaikan bil elektrik berpunca daripada fenomena El Nino.

Dalam pada itu, terdapat juga kes kematian seorang murid perempuan tahun satu di Kota Bharu, Kelantan pada 19 April lalu yang dipatuk ular ketika sedang bermain bersama rakannya di kawasan taman mini berhampiran kelasnya.

Kejadian ular berkeliaran itu juga didakwa berpunca akibat El Nino.

Di Kampung Pasir Panjang, Sabak Bernam, Selangor pula, penduduk gempar selepas seorang pemuda menemui lapan ekor ular tedung hitam yang menjadikan

kawasan halaman rumahnya sebagai sarang tempat mengeram telur. Turut ditemui adalah kira-kira 50 biji telur selain lima ekor anak ular yang baru menetas berhampiran ibu haiwan ber-bisa itu.

Kejadian itu diakui Timbalan Ketua Pengarah Jabatan Perlindungan Hidupan Liar dan Taman Negara, Fakhru Hatta Musa yang berkata, cuaca panas dan kering ekoran El Nino menyebabkan haiwan seperti ular akan mencari kawasan lembap dan sejuk seperti rumah, bangunan, kawasan bersemak serta lubang untuk didiami.

Berdasarkan maklumat di laman web Jabatan Meteorologi Malaysia, setiap dua hingga tujuh tahun, arus laut yang panas menggantikan arus laut yang kebiasaannya sejuk di luar pantai barat Peru, Amerika Selatan.

Fenomena lautan itu disebut sebagai El Nino. Pemanasan lautan ini didapati berlaku di kawasan yang lebih luas meliputi Pasifik tengah dan timur serta mempunyai kaitan dengan peristiwa cuaca luar

biasa di tempat-tempat tertentu di dunia seperti banjir yang teruk dan kemarau berpanjangan.

Fenomena El Nino itu juga dilihat turut memberi kesan terhadap hidupan laut apabila akhbar *The Guardian* pada 30 Disember 2015 melaporkan, kepanasan air di

Lautan Pasifik telah menyebabkan bilangan anjing laut yang mati dan kelaparan dihanyutkan ke pantai semakin meningkat.

Ia dikuatkan dengan laporan Marine Mammal Centre yang berpangkalan di San Francisco, Amerika Syarikat apabila sebanyak 106 anjing laut telah diselamatkan sepanjang 2015.

Sementara itu, Pengarah Pusat Geokejuruteraan Tropika, Fakulti Kejuruteraan Awam Universiti Teknologi Malaysia di Skudai, Johor, Prof. Madya Dr. Edy Tonnizam Mohamad berkata, manusia tidak mampu untuk mengubah fenomena alam itu.

"Kita ada mendengar pendapat yang menjangkakan El Nino dijangka berlarutan dalam tempoh dua hingga lima bulan dan bagi saya, kesannya mungkin akan berlaku sehingga Ogos dan September hadapan sebelum keadaan menjadi normal semula.

"Bila fenomena itu berlaku, sudah tentu ia banyak memberi kesan terhadap alam seperti air menjadi semakin kering disebabkan kurang penurunan hujan. Sudah tentu haiwan akan turut mencari tempat sejuk," katanya ketika dihubungi di sini baru-baru ini.

Menurut Edy Tonnizam lagi, pada masa sekarang juga terdapat beberapa daerah yang mengambil langkah melakukan catuan air seperti di Kota Tinggi, Johor.

Namun katanya, bagi tempoh jangka panjang, potensi air di bawah tanah perlu diambil perhatian dan dijadikan pendekatan alternatif bagi mencari sumber lain pada musim kemarau.

Secara kesimpulannya, kata beliau, ibu bapa juga perlu memastikan persekitaran kediaman berada dalam keadaan bersih untuk mengelak ia menjadi tempat pem-

Headline	Sesuaikan diri dengan kesan cuaca panas		
MediaTitle	Kosmo		
Date	02 May 2016	Language	Malay
Circulation	197,202	Readership	875,000
Section	Negara	Page No	11
ArticleSize	363 cm <sup>2</sup>	Journalist	Bersama .
PR Value	RM 28,260		

biakan haiwan berbisa.

“Cuaca panas dan kering ekoran El Nino menyebabkan haiwan seperti ular akan mencari

kawasan yang lembap dan sejuk seperti rumah, bangunan, kawasan bersemak dan lubang untuk didiami.